

# Program Penghayatan Taman Laut Pulau Perhentian

# **Misi UMK pulihara sumber**

# **Biodiversiti Negara**

Oleh : Syarimie Wosley

Gambar : Al Azam Razi & Wan Fakruzee Ikmal

Hebahan : [Berita@umk.edu.my](mailto:Berita@umk.edu.my)



SEBUT sahaja Pulau Perhentian pasti ramai di antara mereka yang pernah merasai sendiri pengalaman hebat semasa menjelak kaki ke pulau yang telah dinobatkan 10 pulau tercantik di dunia ini.

Pulau Perhentian yang terletak di daerah Besut, Terengganu, ini terdiri daripada Pulau Perhentian Kecil dan Pulau Perhentian Besar sememangnya sudah menjadi antara destinasi popular bagi pelancong dalam dan luar negara.

Jaraknya hanya kira-kira setengah jam menaiki bot laju dari jeti Kuala Besut, kita dapat merasai sendiri keindahan air lautnya yang jernih kebiruan dan hamparan pantainya yang putih bersih serta keindahan batu karangnya yang masih belum terusik dek pecemaran pastinya memukau sesiapa sahaja untuk memilih Pulau Perhentian sebagai lokasi percutian.

Malah, jika anda bernasib baik berpeluang melihat sendiri penyu dari spesis hijau dan hawksbill untuk bertelur kerana Pulau Perhentian adalah antara lokasi menjadi tumpuan dan habitat hidupan itu untuk bertelur.

## **Program Penghayatan Taman Laut**

Namun, keunikan dan keindahan alam semula jadi di Pulau Perhentian yang popular di kalangan pelancong tempatan dan luar negara akan hilang sekiranya populasi yang menjadi habitat hidupan laut di pulau ini semakin pupus kerana faktor pecemaran dan kepupusan.



Menyedari akan kepentingan pemuliharaan hidupan laut dan biodiversiti sebagai khazanah alam yang perlu dimanfaatkan dengan baik untuk memberi kesedaran kepada generasi muda supaya kehidupan marin tidak akan terjejas pada masa akan datang.

Justeru itu, Universiti Malaysia Kelantan (UMK) bersama-sama Sekolah Menengah Kebangsaan Dato' Ahmad Maher menganjurkan Program Penghayatan Taman Laut di Pulau Perhentian, Besut, Terengganu, bertujuan untuk memupuk kesedaran terhadap penjagaan dan pemuliharaan alam sekitar.



Program yang mendapat kerjasama Jabatan Pelajaran Negeri Kelantan, Jabatan Taman Laut, Kementerian Sumber Asli dan Alam Sekitar serta Universiti Sains Malaysia (USM) telah diadakan selama empat hari tiga malam bermula pada 21 hingga 24 Mac 2013.

Pengarah Pusat Hal Ehwal Korporat, UMK, YBhg. Prof. Dr. Nik Maheran binti Nik Mohamed berkata, pihak Universiti tertarik dengan pendekatan yang dijalankan oleh SMK Dato' Ahmad Maher dalam usaha memupuk kesedaran tentang pemuliharaan hidupan laut peringkat sekolah lagi.



Beliau berkata, sebagai sebuah institusi pengajian tinggi awam kami amat mengalu-alukan sebarang usaha dan aktiviti pemuliharaan alam sekitar untuk meningkatkan kesedaran dikalangan orang ramai dan seterusnya untuk memberi mesej kepada masyarakat bahawa pemuliharaan hidupan laut serta alam sekitar adalah tanggungjawab semua pihak.

"Sebagai sokongan, pihak kami telah menghantar seramai 20 pelajar dan 15 staf khususnya untuk bersama-sama 80 pelajar sekolah SMK Dato' Ahmad Maher menjalankan pelbagai program penghayatan hidupan marin di pusat peranginan taman laut itu dan termasuklah melakukan aktiviti pembersihan pantainya," katanya.

Sementara itu, Pengetua Sekolah Menengah Kebangsaan Dato' Ahmad Maher, YBhg. Che Ragayah binti Muhammad berkata, program penghayatan taman laut merupakan program tahunan bagi warga SMK Dato' Ahmad Maher untuk memberikan peluang kepada pelajar menambah ilmu pengetahuan dan pengalaman tentang kepentingan serta pemuliharaan alam sekitar.

Katanya, pendedahan awal tentang biodiversiti alam marin perlu dipupuk di bangku sekolah kerana kesedaran golongan muda amat berkesan dalam menjaga alam sekitar dan hasil laut agar tidak terjejas pada masa akan datang.

“Justeru itu, pendekatan SMK Dato’ Ahmad Maher menganjurkan program ini bukan sahaja untuk penjagaan alam sekitar tetapi membina keyakinan diri para pelajar terutamanya membabitkan aktiviti atau pergerakan yang melibatkan air,” katanya.

## Pengalaman manis

Sementara itu, bagi pelajar Fakulti Teknologi Kreatif dan Warisan, UMK, Mohd Faeze bin Kamarulzaman berkata, program penghayatan hidupan laut ini wajar diteruskan dan dijadikan program tahunan universiti kerana ini adalah tanggungjawab sosial bagi memulihara alam sekitar dan kepentingan ekosistem pada umum.

Jelasnya, selain menjalinkan hubungan silaturahim dengan pelajar sekolah SMK Dato’ Ahmad Maher, peluang seumpama ini amat sukar diperoleh kerana Pulau Perhentian terkenal dengan keindahan pantai dan terumbu karangnya.



“Saya teruja dengan pengalaman pertama terutamanya melakukan *water confident* dibawah bimbingan jurulatih profesional yang memberi tunjuk ajar untuk membina keyakinan diri serta persediaan bagi aktiviti *snorkeling* dan *scuba diving*.

“Tidak ketinggalan, ialah lawatan ke Telaga Air Berani kerana airnya yang tawar tidak pernah kering walaupun pada musim panas,” katanya.

## Janakuasa Hibrid Pertama di Asia

Bagi Norhasmaniza binti Samat, pelajar Fakulti Keusahawanan dan Perniagaan (FKP), Pulau Perhentian bukan saja menawarkan keindahan yang memukau, kami juga turut berpeluang melihat sendiri kincir angin yang terletak di puncak Pulau Perhentian Kecil sebagai lokasi pusat jana kuasa hibrid untuk membekalkan tenaga elektrik kepada penduduk pulau berkenaan.

“Untuk melihat kincir angin kami perlu mendaki lebih 100 anak tangga ke puncak. Walaupun, semua penat dan keletihan tetapi tidak akan sia-sia kerana sampai di puncak kami disajikan dengan panorama indah pemandangan yang cukup mengasyikkan yang sukar digambarkan dengan kata-kata,” jelasnya.



## Keindahan terumbu karang

Menurut salah seorang lagi pelajar FKP, Norhasmaniza binti Samat, pengiktirafan Pulau Perhentian sebagai Taman Laut Negara, amat tepat sekali kerana pengunjung pasti terpesona dengan pemandangan dasar laut dan pelbagai spesies ikan berwarna-warni.

Jelas beliau, pemilihan pulau ini sebagai lokasi program penghayatan taman laut juga amat sesuai kerana Pulau Perhentian memerlukan pemeliharaan dan pemuliharaan bagi mengelak populasi hidupan di sini mengalami kepupusan terutamanya terumbu karang.



“Selain itu, lokasi snorkeling di Shark Point dan Turtle Point pastinya perlu penjagaan kerana kawasan ini memberi seribu pengalaman untuk aktiviti snorkeling seperti didakwa oleh pemilik resort tempat ini adalah paling kerap kelihatan anak jerung atau penyu Karah ,” ujarnya.

Katanya, pengalaman melihat terumbu karang di Pulau Keke dan Taman Laut juga membuatkan para peserta teruja kerana kawasan ini cukup indah dan istimewa kerana masih banyak hidupan laut yang belum terusik.

---